

2 Korinto

¹ Paulo, mutuung'wa nuang'wa Yesu Kilisto kualowe ang'wi Tunda nu Timoteo muluna witu, kitekeelo lang'wi Tunda nelikole Kukorinto, nukuahueli ehi mu neakoe mumukoa wehi nua Akaya. ² Ukende utule ukole kitalanyu nuupolo kupume kung'wi Tunda Tata witu nuMukulu u Yesu Kilisto. ³ Nuakuligwe Itunda nu Tata nua Mukulu u Yesu Kilisto. Nuanso Tata waikende ni Tunda nua ulowe wehi. ⁴ Itunda wekuanji usese munzago yitu yehi, nsoko kina kuhume kuafaliji awe neakoli mulwago, kuuafaliji neangize kufalaja yeyoyeyo ni Tunda aukiilie kuufaliji usese. ⁵ Kunso anga uu ulwago lang'wa Kilisto longeeleka kunsokoitu uu uuu nefalaja itu ongeeleke kukiila Kilisto. ⁶ Kuite ang'wi kuagigwa, kunsoko afalaja anyu nuugunwe wanyu. Ang'wi kufalijiawe hange, kunsoko afalaja anyu. Efalaja anyu ekituma milimo kuulimeeli nemukutula palung'wi mulwago kiugigimeeli anga usese gwa nekuagigwe. ⁷ Nuugimya witu kung'waanyu ukole. Kulengile kinaanga uu nemupalung'wi nulwago, kuu uuu mipalung'wi nefalaja. ⁸ Kunsoko shakutakile unye mutule miapungu, aluna, kukiila lwago naekukete uko ku Asia. Aekuonewe kukila nekuhumile kukenka, anga kina kiagila anga uhueli nua kikie hange. ⁹ Tai, aekukete ulamuli wansha mitaitu. Kuite nianso aeyukutenda usese kulekekuika uhueli pigulya litu usese,

kuleke ite kuike uhueli witu kung'wi Tunda, nueiula iashi. ¹⁰ Aekugunile usese kupuma mungwanso muushi, nukuuguna hange. kuekile ugimya witu kung'wiakwe kina ukuuguna hange. ¹¹ Ukutenda uu anga uu unyenye gwa nemukuailya kumalompi anyu. Iteedu akupumya ilumbi kukiila sesa kunsoko akukuilwa nuukende, naekupewe usese kukiila malompi naantu edu. ¹² kuulingela lele: Uwihiengi wisigolitu, kunsoko inge kisigo niza, nuuza wang'wi Tunda kina aekendile usese mihe. Kutendile ile lukulu nunyenye, hange singa kikulyo launkumbigulu kuleka gwa ile inge nuukende wang'wi Tunda. ¹³ Shakimuandekila kehi neshamuhumile kuki-soma ang'wi kukilenga. Nkete ugimya. ¹⁴ Kina makulenga iniino. Hange nkete ugimya kina muluhiku lomukulu u Yesu kuukila nsoko anyu kunsoko alogoha lanyu, anga uu nemukulula kitaitu. ¹⁵ Kunsoko aenkete uugimya kunsoko aile, aendoilwe kulenga kitalanyu hanze nsoko kina muhume kusingiilya nsailo nakugendeelwe nkue akabiili. ¹⁶ Aekusiga kuagendeela itungo nenongoe ku Makedonia. Hange aentakile kumugendeela imatungo nensukile kumakedonia, nehange unye kuntuma unene imatungo nemomile kuu Uyahudi. ¹⁷ Naekusiga inamna eye, itee aekuailya? Itee? Kupanga imakani kuliganeelya niwilekanuli nuakiuntu, nsoko kina nunge “Eee, eee,” hange Aah, aah” kitungo ling'wi? ¹⁸ Kuite anga uu Itunda nuili mutai, shakelunga yehi “Eee” ne “Aaa.” ¹⁹ Kunsoko ung'wi ilina, u Yesu Kilisto, nae Silvano, Timoteo nunene aekumambilye mitalanyu, agwe,

“Eee” ne “Aah” Kuleke ite nuanso matungo ehi inge “Eee” ²⁰ Kunsoko ulang’wi wehi nuang’wi Tunda eze “Eee” mung’waakwe Uuu gwa kukiila ng’wenso kuulunga “Huueli” kuukulu wang’wi Tunda. ²¹ Itungo ile Itunda nuekueka usese palung’wi nunye mung’wa Kilisto, hange auku-tumile usese. ²² Aeuekile ugomola mitaitu hange aukupee ngwaaung’welu munkolo yitu anga uhkueli aeki nikuupegwa panyambele. ²³ Kuleke ite, kamupepeelya Itunda kunihenga unene kina nsoko naefanyilye ndeke kiza kukorinto inge kinandeke kumulemeelya unyenye. ²⁴ Iye singa nsoko akugema kigeelya uuhueli wanyu nuunanee kutula. kuleka ite, kuituma palung’wi nunye kunsoko aulowa wanyu, anga nemimekile muhueli wanyu.

2

¹ Kute aenamue inino mung’waane unene kina singaae nzile hange kitalanyukuuwai. ² Anga naemumusakeye unyenye uuwai, nyenyu naeuzendoelya unene, kuite yuyu naeulemeigwa nunene? ³ Aemandikile anga neenitumile nsoko kina itungo nenzile kitalanyu ndeke kuaaligwa nawa naeantendile ndoeligwe. Nketa ugimya kunsoko anyu meeji kina ulowi wane inge ulowi wuwowuwo nemukete unyenye miehi. ⁴ Kunsoko aenumuandekie unye nsoko alwago lukulu, nulwagola nkolo, nukuliholi ledu. Singa aentakile kumusakiilya unye uuwai. Kuleka ite, aendoilwe mulenge uulowa nuamuhati nenukete kunsoko anyu. ⁵ Ang’wi ukole wehi nusakilye uuwai, singa usakilye kung’wane du,

kuite upikeeli unino - singa kueka utaki kukila
 - kitalanyu unye mehi. ⁶ Uwu ulamuli wa-
 muntu uyu kuawa needu ukondile. ⁷ Kuite
 itungo ile kuleka uulamuli, inonee kumusamil
 nukumupa inkani ninza. Itumi uu nsoko
 kena waleke kuleng'wa nuukia nuedu. ⁸ Kuite
 ukumutia moyo higeelya uulowa wanyu mue-
 gusi kunsoko anyu. ⁹ Eye yi yi nsoko nakuan-
 deka, nsoko kina nihume kumugema nukulenga
 kina ang'wi mukugomba kela ikentu. ¹⁰ Ange
 mumusamile wehi, nunene gwa kumusamil
 umuntu uyo. Ike nekikole kisamile - ang'wi
 samie keki - kesamiwe kunsailo anyu kuukole
 nuang'we Kilisto. ¹¹ Iyi kena umulugu waleke
 kutendela uteele. Kunsoko usese singakiapungu.
 Kumupango wakwe. ¹² Umulango aeuluguwe
 kung'wane nu mukulu naenzile kukesali ka
 Troa kutanantya inkani ninza niang'wa Kilisto
 pang'wanso. ¹³ Ata uu, aenemugila uupolo
 nuankolo, kunsoko singa aenumuhongile umu-
 luna wane u Tito pang'wanso. Uu nekaaleka
 nukusuka ku Makedonia. ¹⁴ Kuite walumbwe
 Itunda nai mung'we Kilisto nkua yehi weku-
 tongueela usese muuduli. Kukiila sese kesa palilya
 unyunki nuuza nua mahala akwe kunkika yehi.
¹⁵ Kunsoko usese kung'wi Tunda, inge keun-
 yuki uza nuang'wa Kilisto, ehi muawee nea-
 gunilwe nemuawee neakulimeligwa. ¹⁶ Kuantu
 neakulimeligwa, inge unyunki kupuma nsha
 sunga insha. Kuawa neakuguneaka, inge unyunki
 nuuza kupuma upana sunga upanga. Nyenyu
 nukimeka mumaintu aya? ¹⁷ Kunsoko usese
 singa anga antu neangiza neegulya ulukani

lang'wi Tunda kunsailo. Kuleke ite, kuuza nisigo, kuutambula mung'wa Kilisto anga uu nekutumilwe kupuma kung'wi Tunda, ntongeela ang'wi Tunda.

3

¹ Itee manza kikulya unyenye hange? Shangakulolwe ibada lakielya kung'waanyu, ang'wi kupume kung'waanyu, ang'wi anyu, itee kusingigwene? ² Unyenye lukulu nibada litu nelabaguwe, neandekilwe munkolo yilu, nelengekile nukusong'wa neantu ehi. ³ Hange mukigela kena unye mibada kupuma kung'wa Kilisto, nepumigwe nusese neandekilwe singa kuwino ingekunkolo ang'wi Tunda nukole mu-pango. Shanga iandikilwe migulwa laibada niamagwe, inge muibada ya nkolo yaantu. ⁴ Nuwu inge ugimya nekukete kung'wi Tunda kukiila Kilisto. ⁵ Shakikuie usese kudaya kehi kupuma kitailu. Kuleka gwaite, kihuela use kupumile kung'wi Tunda. Inge Itunda naukutendile kuhume kutula kiatungwa ilago nipyä. ⁶ Itago ele singa libada inge lankolo. Kunsoko ibada lebulaga, kuile inkolo epumya uupanga. ⁷ Itungo ele umulemo nuansha naeusesilwe kuuandeki migulya amagwe aezile kuukulu kena iantu akuisilaeli shanga aiagozile ung'wi ung'wi muusu nuang'wa Musa. Kunsoko eye uukulu nue usu wakwe, ukulu naeukulimansiila. ⁸ Itee, umulimo nuang'waung'welu shanga ukutula nuuukulu kukilane? ⁹ Kunsoko anga uwitumi nuaulamuli aeukete ukulu, nkuaininga lukulu uwitumi nuatai wehile lukulu muukulu!

10 Inge tai kena, eke naekelendile ukulu hauza kigila uukulu hange kukuligwe ite, kunsoko aukulu nuukelinkie. **11** Kunsoko anga keke naekekeile aekekelle uukulu, kuugeelike kueke nekikole kekulula nuukulu. **12** Kunsoko hihuie uu, kukete ugimya kulela. **13** Kuhetile anga Musa, nauekee ugole muusu wakwe, nsoko kina iantu akuislaeli aleke kulimensila lukulu kumpelo naukulu naeweze hegeka. **14** Kuite ulengi miao aeuambilwe. Sunge uluhiku lulu utaji wuwowuwwoo heli usagile kuusomi nuilago lakale. Shanaiekilwe ng'walye, kunsoko inge kung'wa Kilisto udu ekuhegigwa kule. **15** Kuite ata elelo, kumatungo eki u Musa nuesong'wa, uutaji wikie munkolo yao. **16** Kuite umuntu nuemupelukila u mukulu, uutaji wehegigwe. **17** Itungo ile umukulu inge nkolo. Nekole inkolo a mukulu, ukole widesi. **18** Itungo ele usese keehi, palung'wi nuusu nesinga iekiwe uutaji, yeuona ukulu nua Makulu. Kepeulwa mukali awigeeli wuwowuwo nuaukulu kupuma muwhengi ung'wi nua ukulu kulongola kungiza, anga niele kupuma kumukulu nenkolo.

4

1 Kuitegwa, kunsoko kukete witumi uwa, hange anga uu nikusingiiye uukende, shanga kuusuke ekenyuma. **2** Kuleka ite, kuihilile inzila yehi niamenti nizi neyipihile. Singakikie kuwelu, hange singa kulitumela niibe ulukani lang'wi Tunda. **3** Kuile angwi uutananti witu wipihile, wipihile kuawa nialimie udu. **4** Kuusaguli wao nuao, itunda nu-

aunkumbigulu uwu uapokuuye uulengi wao neshaukuie. Uwigeeli wakwe, shanga akuone uwelu wautananti nua ukulu wang'wa Kilisto, nekilingasiilyo kang'wi Tunda. ⁵ Kunsoko singa kiutanantya use, inge Kilisto Yesu anga Mukulu, nuseso anga keitumi anyu kunsoko ang'wa Yesu. ⁶ Kunsoko Itunda ng'wenso nae ulungile, "Uwetu ukumileka kupuma mukili." Wamileka munkolo yitu, kupuma muwelu nuamahala naukulu nuang'wi Tunda kuumole nuang'we Yesu Kilisto. ⁷ Kuite kukete wiekeli suu muiseme yaulolo, nsoko kena ilengike kena engulu nenkulu kukela inge nang'wi Tunda hange singa itu. ⁸ Kuaga mukala ehi, kuite shakulemigwa. Kuona uaeli kuite shakizuwe nukumala insula. ⁹ Kuagigwa kuite shakulekilwe. Kuugung'wa pihe kuite shanga akulimansilya. ¹⁰ Mahiku ehi kunkenkile mumuile witu ensha ang'wa Yesu, nsoko kena uupanga wang'wa Yesu wigelelegwa mumeili itu. ¹¹ Usese nekia-panga mahiku ehi kupumigwe kusha kunsoko ang'wa Yesu, nsoko kina uupanga wang'wa Yesu wigele mumeile itu nakeuntu. ¹² Kunsoko eye, ensha ekituma umulemo nutaitu, inge upanga ukitura umulemo mitalanyu. ¹³ Kuite kukete inkolo yeoyeeyo nauhueli anga kiki nekian-dekilwe. Aenikuie, kuite nekalunga. "Nuseso gwa kukwie nukuite gwa kuulunga. ¹⁴ Kulengile hena uyu naumuiue uMukulu u Yesu ukuiulagwa usese palung'wi nunyee kuukole wakwe. ¹⁵ Kela kentu nsoko anyu nsoko kena, kuukende nululongolekile kigela kuantu needuu, isongeelyo

longeeleke kuukulu nuang'wi Tunda. ¹⁶ Ite shanga kuusuke ekenyuma. Ataeze kunzi kuubepa, mukali kuutendwa upya luhiku sunga uluhiku. ¹⁷ Kuugeng'wi uwu nuukupe, ulwago ulu lupepee lukuunoneelya usese kunsoko aukale nuulito nuankulu nuukeile ugemeeli wehi. ¹⁸ Kunsoko shakugozile imaintu nige, inge kunsoko amaintu neshangaigee. Imaintu nekuhumile kumaone itungo udu, inge imaintu neshangaigee. Imaintu nekuhumile kumaona itungo udu, inge imaintu neshanga igee akale.

5

¹ Kulengile kene anga umuula nu-aunkumbigulu nekikie mung'wanso wibipa, kukete ito kupuma kung'wi Tunda. Inge ito neshalenonigwe kumekono akiuntu, inge ito lakale, umonulinde. ² Kunsoko mito ele kilwale, kezaa kukete nsula kuimbwa nulikalo litu kilunde. ³ Kezaa kukete nsula kunsoko kuele kunsoko akutugala singa kuigela kutula kekefue. ⁴ Kutai lukulu itungo nekukole mito ele, kealwae kulemeigwa. Shakutakile kulugulwe. Kuleka gwa ite kuloilwe kutugalwa, nsoko kena eke nekekule kehume kumilwa nuupanga. ⁵ Uyu naeukunoneeye usese kukentu eke inge Itunda, naeukupee usese inkolo anga kilingasiilyo haikinejipembilye. ⁶ Kuite gwa mutule nuugimya mahiku ehi. Mutule miho (mogoze) kena imatungo nekukole mito ekemuili, kukole kuli nu Mukulu. ⁷ Kunsoko kuugendei keuhueli, singa kuakuona. Kuite kukete ugimya. ⁸ Inge iza kutule kuli kumuili

mito palung'wi nu Mukulu. ⁹ Kuite kuituma kutula isego litu, anga ezekukole kito angwi kuli, kumuloelye nuanso. ¹⁰ Kunsoko kusija keehi kuuona ntongeela itunda la ulamuli nelang'wa Kilisto, nsoko kena kela ung'we wao wahume kusengilya eki nekegombekile kumakani nazatendekile kumuili, angeze kuuza ang'wi kuubi. ¹¹ Kuite, kuulenga uwoa nua Mukulu, kuaaluta eantu, uu nekile, yegeelekile ng'walyi ni Tunda. Nihuie kena malengagwa mumasigo anyu. ¹² Shakugema kumupepeelya unye hange kuugoza usese angwi kiatai. Kuleka gwa ite, kuumupa unyenye nsoko akitogola kunsoko ilu, nsoko kena kuhume kutula nukususha kuawa neakilogola kukiila wigeeli kuite singa ike nekekole munkolo mukali. ¹³ Kunsoko angeze kapulwa numahala, inge kunsoko ang'wi Tunda. Hange anga kupuma mumahala itu napikiie, kunsoko anyu. ¹⁴ Kunsoko ulowa nuang'wa Kilisto ukuulula, kunsoko kuhuieela: kena muntu ung'wi aukule kunsoko aantu ehi, nukuuu ehi akule. ¹⁵ Nu Kilisto aeukule kunsoko aantu ehi, nsoko kenaawa neikie aleke kikie hange kunsoko aoenso. Kuleka ite kusinja ikie kunsoko akwe huuyu naukule hange wikaiulwa. ¹⁶ Kunso eye, kanziilya itungo leli nukulongoleka shakunilamula umuntu anga uugeeli wakwe nua keuntu, alezeapo pang'wandyo aekumugozile u Kilisto kuugozi wuwu. Kuite itungo ele shakumulamila wehi kundogoilyo eye hange. ¹⁷ Kuite angeze muntu wehi ukole mukati ang'wa Kilisto, nuanso keumbe kepya. Imakani nakali akeile. Goza

aina mapya. ¹⁸ Imaintu aya ehi apumile kung'wi Tunda. Aeukuhungila usese kung'waakwe ung'wenso kukeela uKilisto, hange wakupeza witumi nuakuhunga. ¹⁹ Ite ukulunga, mung'wa Kilisto, Itunda ukuuhunga uunkumbigulu wakwe ung'wenso, singa kualya ulutumo lao mung'waa. Uhumile kitaitu ulukani lautungi. ²⁰ Kuite kusaguwe anga keemeli ang'wa Kilisto, anga kina Itunda aukituma ulongoleki kukiila sese. Kumupepeelya unyenye kunsoko ang'wa Kilisto: mulanulwe kung'wi Tunda! ²¹ Aeuutendile u Kilisto kutula isongeelyo lamilandu itu. Nuanso ng'wenso shaae witumile imilandu. Aewitunule ite nsoko kukume kutula tai ang'wi Tunda kukeela ng'wenso.

6

¹ Nukuite kitume milimo palung'wi, kumu-pepeelya unye muleke kusingililya ukende nuang'we Itunda nekanda. ² Kunsoko ulungile, imatungo nagombekile aenekusa kung'waanyu, nukuluhiku lakugunwa nenumu aenumuaeye. “Goza, epaino inge matungo nagombekile. Goza itungo eleluhiku lakugunwa. ³ Shakueka igwe lakugilya ntongeela amuntu wehi kunsoko shakuutakie uwilumi witu wize kulukumo nulubi. ⁴ Kuleka gwa ite, kuigoza usese kuntendo yitu yehi, kena keitumi ang'wi Tunda. Keitumi akwe kuudu nuakugomba kagigwa, nzago, ukaku nualikalo, ⁵ kukuwa, itungo, ubulugwi, kituma imelemo kukinyangulu, kuulya utulo uutiku, nemunzala, ⁶ numuwelu, upolo, ukende, nukugwa ung'welu, nemulowe nua

tai. ⁷ Keituma akwe mulukani latai, kungulu ang'wi Tunda. Kukete milahilo atai kunsoko amukono nuakigoha nuwu nuankigi. ⁸ Kuituma umulemo kuukuligwa nukumelwa, kugiligwa nukupegwa lukumo. Kusemewe kena keetele kunu kea tai. ⁹ Kuituma umulemo anga shanga kutengikile hange kulengekile iza tai. Kuituma umulemo anga kiakunsha hange, Goza! kukeli kuikie. Kuituma umilemo anga kuulamulwa kunsoko antendo yitu kuite singa anga nialamuewe kunsa. Kuituma umulemo anga kukete ukia, kuite mahiku ehi kukete ulowa. ¹⁰ Kuituma umulemo anga heaula, kuite kuu-golipy neangiza. Kuituma umulemo anga kenashakuulija anga kentu inge kumbi kela kentu kitu. ¹¹ Kuligitilye etai ehi kitalanyu, Iakorintho, ninkolo yanyu ilugukile kuugale. ¹² Inkolo yanyu singa igiigwe nusese, inge nugiigwe nu-usegi wanyu unyenye. ¹³ Itungoele kikila kutai kuligitya anga kuang'enya - kiguli inkolo yanyu kuugale. ¹⁴ Muleke kutula palung'wi nawa nesinga akuie. Kunsoko ukole upalung'wi kee kuawa nea tai nawa neashapu? Hange ukole upalung'wi kee kuwelu nekiti? ¹⁵ Wigombi kee Ukilisto nuhumile kutula nuwenso nu Beliari? Ang'wi nuanso nuhuee ukete nekiule nekeniino palung'wi ninyu nushuuuhuie. ¹⁶ Hange ukole wigombi kee nuukole mutekeelo lang'wi Tunda niadudu? Kunsoko use kitekeelo lang'wi Tunda numupanga, anga uu Itunda nautambue. Kikie mung'waa nukugenda nienso. Kutula ni Tunda wao, nienso akutula antu awe. ¹⁷ Kuite, pumi mung'waa, hangi mulemanuke nienso ulungile

umukulu. Muleke kuambe nikibi, hange kumusingiilya unyenye. ¹⁸ Kutula neTata wanyu, nunyenye mukutula meanaane niakigoha naa niakilima,” Ulungile u Mukulu nuakale.

7

¹ Alowa ane, kusoko kukele ulagwi uwa, alikielye usese kikani nilekumile kuushapula imili ninuinkolo. Hange kuudume uwelu kuwoa nuang'wi Tunda. ² Leki ilyoma kunsoko anyu! Kukeli kumutumuile muntu wihi. Shakumulemaaye muntu wihi. Shakigolepilye kunsao amuntu wihi. ³ Akulunga ele singa kenisusumilya. Kunsoko nalungekena mukole mitaitu, kitaitu usese kuusha palung'wi nukikie palung'wi. ⁴ Nkete ugimya ukulu mung'waane, hange kitogola kunsoko anyu. Nizuwe nuulowa sunga mulwago litu lehi. ⁵ Aekizile Kumakedonia, imili itu aemegila anga usupi. Kuleka ite, aekagile kunkika yehi kukuwa embita kunkika akunzi nu woa kunkika namunyumba. ⁶ Kuite Itunda, nuekuila inkani ninza kuawa neamaile insula aeukuie iza kung'wa Tito. ⁷ Singa aekiza kungwaakwe udu kena Itunda aukuie iza aetuile gwa uuza uo uiito nausingiye kupuma kitalanyu. Nuanso aukuie ulowa nuukulu nemukete ukia wanyu, hange naza mukete uuaeli kunsoko ane. Uu natula nuulowa kukila. ⁸ Ateze ibada lane aelemusakeeye kusega, unene singa kukuila engali, kuite kukuela engali itungo naenune ibada nelanso aelemutendile unyenye mekatula nuukie kuite aemukete ukia matungo makupi. ⁹ Itungo ele ndoilwe, singa kunsoko

amulide lwago, kuite nsoko aukia wanyu wika-muhugeelya kuungama. Aemuligigwe nuukia wang'wi Tunda, uu aemagigwe singa nekanda kunsoko ilu. ¹⁰ Kunsoko uukia wang'wi Tunda wileta kuungama wipikeelya uguni eze kulile anga ngali. Uukia wamihe, ata uu wileta nsha. ¹¹ Ugozi uukia wang'wi Tunda aeutugisilye upikeli kee nuukulu mungwaanyu. Aeule uupi-keeli naeukulu mung'waanyu kigeela kena aemi-agila anga igazo. Aeuli uwai wanyu naeukulu, woa wanyu, ensula anyu, kinyangulu kanyu, ne nsula anyu kugoza kena itai inonee igele! Kukela ikani migeelya unyenye kutula miagila anga igazo. ¹² Ateze aemuaandikie unyenye, singa aenumuandekie nsoko alutumo, hange singa kumuntu nuagigwe nuudobu, mandikile nsoko kena etai, ankolo yanyu kunsoko anyu itu ehuma kulengika kitalanyu ntongeela amiho ang'wi Tunda. ¹³ Kunsoko eye kena huelwe iza. Muwongeeli nuakuelwa uza witu us-ese kuloilwe gwa, ata kukila ulowa nuang'wa Tito, kunsoko enkolo akwe aeiloeigwe nun-yenye meeji. ¹⁴ Kunsoko ang'wi aembogoe kung'waakwe kukeela nyenye, aenemugila anga minyala. Kensengelima kakwe, ang'wi udu kela lukani naekululigililye kitalanyuelatai, uwihumbuli wanyu wilu kukeela nyenye kung'wa Tito neigeeye kena tai. ¹⁵ Ulowa wakwe kunsoko anyu ukulu kukila anga uunukembukile ugombi wanyu wihi, naimumusingeeye nuanso kuwoa nukukagata. ¹⁶ Ndoilwe kunsoko nkete ugimya nuukondile mukati anyu.

8

¹ Kuloilwe unyenye mulenge, akaka nia dada kuukende wang'wi Tunda nuupumilye mumate-keelo a Makedonia. ² Matungo nigeng'wa nikulu nelalwago, udu nuaulowa wao nuongeeleki nuauhimbe nuao waluga ugole ukulu nuaukende. ³ Ung'waaao kihenga kina aeapumilye anga naiahumile, hange ala nukukila naiahumile. ⁴ Nukuulowi nuao ienso kuupepeelya kuudu, aeakulompile kunsoko aupalung'wi miumumi uwu kuahueli. ⁵ Ite singa yigee anga naikusegile, kuleka ite, ng'wandyo aeipumilye ienso ku Mukulu. Hange akipumya ienso kitaitu kuulowa wang'wi Tunda. ⁶ Ite aekumupepeeye u Tito, naekondile kanziilya umulimo uwu, kuleta muukondi ukende uwu mung'waanyu. ⁷ Kuite unyenye mukete maintu edu - muuhueli, muntambu, mumahala, kenyangulu, nukuulowa wanyu kunsoko anyu. Ite kendgeeli unye kena mukete ukende du mutendo eye. ⁸ Kulunge ile singa ilago. Kuleka ite, kukinga ile nsoko akuge-meelya lukulu nua ulowa wanyu kuugemeelya munsula aantu needu. ⁹ Kundogoilyo mulengile ukende nua Mukulu witu u Yesu Kilisto. Ateze aemugole, kunsoko anyu muhimbe nsoko kena kukiila uhimbe wakwe muhume kutula migagle. ¹⁰ Mikani ele kumupa usigi nukumuailya. Ng'waka ung'wi nuukeile, shanga aemanzilye udu kituma ikani. Kuite aensumbeye kulitura. ¹¹ Itungo ele lipikeeli. Anga uu udu naekusumbeye nisego lakituma, hange, itee, aemuhumile gwa kuleta mumaeli mugeeli nua uhumi wanyu. ¹² Kunsoko mukete nsula akituma en-

tendo eye, inge ikani iza hange legombekile. Kusinja lemeke migulya aile nukete umuntu, singa migulya laeki numugila umuntu. ¹³ Kunsoko umulemo uwu singa kunsoko kina neang'wi ahume kulija ubahu nu nyenye muhume kulemeeligwa. Kuleka ite, itule sawasawa. ¹⁴ Udu wanyu imatungo nitungeli ukuaelya kueke nulakile. Ite uu gwa nsoko kena udu nuao ahume kuailya uula wanyu hange kena atule sawasawa. ¹⁵ Ite inge anga niandekilwe "Nuanso nukete nedu mugila anga kentu kehi nekesagile nung'wenso nukete keninoo mugila anga uula wehi. ¹⁶ Kuite walumbwe Itunda, nauekie mukati ankolo ang'wa Tito inkolo yevo yeyoo nakinya ngulu kakukela ninkete kunsoko anyu. ¹⁷ Kunsoko singa anga udu ausingi-iyе imalompi itu, ingegwa aukete kinyangulu palung'wi nemalompi nanso auzile kitalanyu kuugombi wakwe ung'wenso. ¹⁸ Kumutumile palung'wi nuyo umuluma nukukuligwa mmatekeelo kunsoko amulemo wakwe nuakutanantya inkani ninzinza. ¹⁹ Singa uu udu, kuite gwa ausaguwe nematekeelo kulongola nusese kulekenka muianza yedu ikani ele nelaukende. Ite inge kuukulu nua Mukulu ung'wenso kunsula itu nakuaelya. ²⁰ Kuinega itule kena inonee kisusumya kukeela sese nukukeela ukende uwu nekuukenkile. ²¹ Kuuhola ukendegeeli kituma nekekukuligwa, singanga ntongeela a Mukulu udu, kuite gwa ntongeela aantu. ²² Hange kumutuma umuluna nemungiza palung'wi nienso. Kamugemela nkua yedu, hange kamuona ukete nsula nsoko amilemo du. Ata itungo lele ukete

kinyangulu kukila kunsoko augimya nuukulu nukete mukali anyu. ²³ Kumpola niang'wa Tito, nuanso wipalung'wi nunene hange mituma nutemo miane kunsoko anyu. Anga kualuna itu, akutung'wa nematekee3lo. Ikulyo kung'wa Kilisto. ²⁴ Ite alageeli uulowa wanyu, hange mualagiile mumatekeelo nsoko awiloli witu kunsoko anyu.

9

¹ Kukeila muwitumi kunsoko ahueli, inone lukulu kung'waane kunuandekila. ² Nengile munsula anyu, nai nilogoee kuantu nia kumakedonia. Aeneaiye kene u Akaya ugombile kupumila ung'waka naeukeile. Insula anyu aatia moyo eduaao kituma. ³ Itungo ele, natuma ialuna nsoko kena uwilogoli wilu kukeela nyenye uleke kulula nekanda, nensoko kena azamezee konda, aemezeetula anga naenungile. ⁴ Ang'wi shanga uu, ang'wi muntu wihi nuakumakedonia angawize palung'wi nunene nukumuuhanga shamugobile, akeze hung'wa nunyala - sunga kulunga lehi kunsoko anyu - kunsoko nemugimya kukila mungwaanyu. ⁵ Ite aenune kina nsanilye kuapepeelya aluna kiza kitalanyu nukituma unoneeli nuakukaya kunsoko azawadi naemuiwe. Ite inge uu nsoko kena itule ikondile anga ukembetwi, hange singa anga kentu nekilagilwe. ⁶ Isego inge sile, umuntu nuetemele usheenyi wiogola usheenyi gwa, hange wehi nuetemela usheenyi wiogola usheenyi gwa, hange wehi nuetemela kisigo lakukembelwa wiogole kukembetwa gwa. ⁷ Inge hange kela

ung'wi apumye anga uu nusigile munkolo akwe. Inge nung'wenso alekekupumya kuukia ang'wi kusingigwa. Kunsoko Itunda wimulowa uyu nuepumya kuulowa. ⁸ Ni Tunda uhumile hongeelya uukembetwi kunsoko anyu, kunsoko kena, kukela itungo, mumakani ehi, muhume kongeela kela entendo ninza. ⁹ Anga uu nian-dekile: "Wauhola ugole wake nukuapa iahimbe. Itai akwe isaga ikale." ¹⁰ Nung'wenso nuepumya embeu kumutemeli numukale kunsoko andya, ukupumya gwa nukongeelya embeu anyu kunsoko akulowa. Nuanso ukongeelya imaogola atai anyu. ¹¹ Mukugolepa kukila nsoko kena muhume kutula meakende. Ite yukuleta ilumbi kung'wi Tunda kukiila sese. ¹² Kituma uwitumi uwu singa anga yukutomolya udu uula nuahueli. Wongeelya intendo yedu gwa neyilumbi kung'wi Tunda. ¹³ Kunsoko kugemeeligwa kung'waanyu nukigeela kuwitumi uwu mukumukulya Itunda gwa kugomba nukutambula kung'waanyu inkani ninziza nian'wa Kilisto. Mukumukulya Itunda gwa kuukende nuaupegwi wanyu kitolao hange kela ung'wi. ¹⁴ Amuketee nsula, hange akulompa kunsoko anyu. Aku-tenda ite nsoko aukende ukulu nuang'wi Tunda nuukole mung'waanyu. ¹⁵ Ilumbi letule kung'wi Tunda kukepegwa kakwe nesinga keligilyika!

10

¹ Unene ne Paulo, unene kumupepeelya kuupolo nuang'wa Kilisto. Unene nemupolo itungo nenhole ntongeela anyu, kuite nkete ugimya kitalanyu itungo nenkole kuli nunye.

² Kumulompa unye kena, itungu nenkole palung'wi nunye, shangakutula nuugimya itungo nekuagilya awa neasegile kena kikie kemule. ³ Kunsoko ataeze anga kuugenda kimuili, shanga kikua embita kimuili. ⁴ Kunsoko iyeye nekutumela kikuila singa yamuili, kuleka ite ikete ngulu ung'wi Tunda kubipyा ukulu. Yukuheja lukulu udui nuakubepya. ⁵ Inge kuubepya kehi nekikete uuhumi nekikulya ntongeela ang'wi Tunda. Kuuletenda mateka kukela uhumi nukumugomba Ukilisto. ⁶ Hange kuulija ugombinuakulamula kela intendo nimbe, nkua udu ugombi wanyu nuukutula wakonda. ⁷ Goza eki nekikole ng'walye ntongeela anyu ang'wi wili ukupepeleka kena nuanso wang'wa Kilisto, nuikembushe nuanso ung'wenso kena anga uu udu nuile wang'wa Kilisto, ite uu nusese kile gwa. ⁸ Kunsoko atanitogole inino udu kukeela uhumi witu, nu Mukulu aupumilye kunsoko ilu kumuzenga unyenye singa kumubipyा, singa kuona imenyala. ⁹ Singa ndoilwe ele ligele kena kumutumbaunye kumabada ane. ¹⁰ Kuite antu ang'wi elunga, "Ibada yakwe itaki hange ikete ngulu, kuite nuanso munegetu ekumuili Inkani yakwe singa inonee kutegeligwa." ¹¹ Embu iantu anga awa nealengile kena lehi nekutambula kibada itungo nekukole kuli, inge anga uu ite nekika tende itungo nekukole pang'wanso. ¹² Shakinzu nkuli du anga kilingeile usese ang'wi kigemela usese nawa neikulya ienso. Kuite neigemeelya ienso kukela ung'wi wao, agila anga mahala. ¹³ Usese, ata uu, singa kuitogola kukeela membi. Kuteka

ite, kutenda uu udu mumembi izi ni Tunda ukupimie usese, membi niigeile kuli anga nianyu niele. ¹⁴ Kunsoko usese shanga aekiongeeye naekumizee unyenye. Ae kiang'wendyo kupika kuukuli anga nuanyu kunsoko ang'wa Kilisto. ¹⁵ Shanga kiloiye kukeela membi kumilemo aangiza. Kuleke ite, kuhuie uhueli wanyu uukuli wakwe kena ikianza kitu nehamalemu kekugalempigwa lukulu hange keli mumimbi lukulu. ¹⁶ Kuhuie kuile, nsoko kena kuhume kutanantya ulukani ata mumekoa kukila nanyu. Shanga kuutogola kukeila milimo nekitung'wa muianza nungeza. ¹⁷ “Kuite wehi nuitogole, nuitogola Mumukulu.” ¹⁸ Kundogoilyo singa uwo nuigeela ung'wenso ukigela. Inge uyu nu Mukulu wimigelya.

11

¹ Kupepelya kene munindeele unene muupungu. Kuite kutai mukunindeila unene. ² Kunsoko nukete uwelu kung'waanyu. Nkete welu kung'wi Tunda kunsoko anyu kupuma naenemuie muwileni nuamusungu ung'wi. Aenumuike kumuleta unyenye kung'wa Kilisto anga munanso numuza. ³ Kuite nogopile kena kuuli, anga enzoka naeimukongee u Eva kuuteele wakwe imasigo anyu ahumile kupeulwa kule kupuma mikulyo lukulu niza kung'wa Kilisto. ⁴ Kunsoko kukelengasiilyo kena muntu wekiza nukutanatya u Yesu mungiza singa anga uyu nekumitanantilye. Ang'wi kukilengasiilyo kena musengeelye utananti ungiza shanga - uwu nae musingeiye. Mulindeile

imakani nanso iza ikondile. ⁵ Kunsoko kusaga kene unene singa nepalung'wi muawe nea pihe kuawa neakitangwa aluung'wa neaza. ⁶ Kuite ateze unene singa manyisigwa kupumya ulusimu, kutile ite mumahala. Kukela lehi kumakani ehi kutendile ite kulengika kung'waanyu. ⁷ Itee, aenitumile mulandune kisimya unene nsoko unyenye muhume kuhumbulwa? Kunsoko aetanantya kuwidesi inkani ninziza niang'wi Tunda kung'wa anyu. ⁸ Aeneahegeeye imatekeelo nemangiza kusingeilya uaeligwa kupuma kitalao nsoko kene aenihumile kumitumila unyenye. ⁹ Imatungo nae nkole nunyenye aenkole muula, singa aenumuhumieye wihi. Kunsoko uula wane aeukondigwe nea luwa naeazile kupuma kumakedonia. Mukela kentu nigiiye unene kuleka kutula nemuligo kunywaanyu, hange kulongoleka kutenda uu. ¹⁰ Anga itai nang'wa Kilisto neli mukali ane, kunu kikulya kung'waane shanga yukukilegigwa munu muakaya. ¹¹ Kunekee? Kunsoko singa numuloilwene? Itunda uine numuloilwe. ¹² Kuute ehe nekituma, kitumagwa kituma nsoko kene nihume kugilya lyoma a awa neahete insula ilyoma kena anga nekile mukeko kikoo neakiloelya. ¹³ Kunsoko iantu ao inge atuung'wa auteele hange itunu neakulongopa. Akipiula ienso ang'wa Kilisto. ¹⁴ Neli singa ikuelwa, kunsoko ata umulugu wipiule ung'wenso anga malaika nua welu. ¹⁵ Iye kutile anga ikuelwa nikulu anga itumi akwe gwa kipiule ienso anga itumi atai. Ugeeli wakwe yukutula anga intendo

yao nieli. ¹⁶ Kutunga hange: Inge waleke kutula muntu wehi nukusiga unene nemupungu. Kuite anga mutende, nsingilye unene anga nemupungu nsoko nihume kikulya iniino. ¹⁷ Iki nekulunga kunu kihuera kuwikumbuli nuakemuile nuku Mukulu. Kuite kuligitya anga nemupungu. ¹⁸ Kunsoko iantu edu itogola ike muili, kitogole gwa. ¹⁹ Kunsoko aemuhoilwe nuulowa kuupungu, unyenye lukulu mukete mahala! ²⁰ Kunsoko mukukolwa numuntu anga wauike muutung'wa, anga musashe wisapateli mung'waanyu, anga wamutumele unye kunsailo akwe, anga wieke migulya, angwanga wamukue muusu. ²¹ Kulunga kuminyala itu kena usese kiaitula heanegetu lukulu kituma ite. Ikele hange wehi anga wabunange - kuligitya anga nemupungu - nunene goa kitogola. ²² Itee, neanso Ayahudi ne? Nunene inge uu. Itee, neanso Aislaeli ne? Nunene inge uu. Itee, Neanso utuungwa wang'wa Ibulahimu ne? Nunene inge uu. ²³ Itee, neanso itumi ang'wa Kilisto ne? (Kutambula anga mpulilwe ne mahala) Unene inge kukela. Nkule ata mumelemu nemikaku lukulu, kule kukile niitungo, kukuwa nekutile anga ngele, nukuluta pakupe nensha. ²⁴ Kupuma kuayahudi nsingeye nkua itaano, "mapigo makumi anne kuheja ling'wi." Nkua itaatu aenkuilwe milanga. ²⁵ Nkue eng'we aenkuilwe magwe. Nkue itatu mponee inino kusha mumeli. Ntumie utiku nu mung'wi mubahali neng'walye. ²⁶ Nekatula nemilinzo apakupi pakupi, kuponela ininoo mumiongo, kuponela iniino mualugu, kuponela

iniino muantu ane ienso, kuponela iniinoo kuantu amakikupuma kuponela iniino muisale, kuponela iniino kupuma mualuna nealeele.

²⁷ Aenkule mumulemo ukaku hange mulikalo nulukaku, muuliku widu shanga aenelala, munzala ne nyota, kua yedu kufunga, mumpepo nekipwi. ²⁸ Kuleke naye nemangiza, ukole usukung'wi nuakela luhiku kunsoko ane imasigo ane kunsoko amatekeelo. ²⁹ Nyenyu numunegetu, nunene singe nemunegetune? Nyenyu nusakilye numungiza kung'wa mumilandu, nunene shanilwalane mukati?

³⁰ Ang'wi kusinja nitogole, kitogole kukeela ehe nekulagiila unegetu wane. ³¹ Itunda nu Tata nu Yesu nu Mukulu nuanso nuekuligwa ikale, ulengile hene unene singa kukongela (kulongopa). ³² Uko kudameski, mukulu nua mukoa pihe amutemi Areta aekuunga ikesale nekakudameski nsoko akumamba. ³³ Kuite nekaikwa munkapu, kukiila kidilisha kukeila mikiligo, nekaponela inino kuhega mume kono akwe.

12

¹ Kusinja nitogole, kuite kutile nekekongeeli ligwa nelo nelanso. Inge kulongoleka mumaono nema nuukunukuilwa kupuma kumukulu.

² Numulengile umuntu ung'we mung'wa Kilisto mumyaka ikumi leng'wi numunane nekiile - nemuile, ang'wi kunzi amuili, unene singamine, Itunda uine - ausapuwe migulya milunde lakataatu. ³ Hange nengile kena umuntu uyu - angeze kumuili, ang'wa kunzi a muili,

unene singa mine Itunda uine - ⁴ aeuhoilwo migulye sunga kuparadiso nukija imakani awelu kukila kumuntu wehi kuletambula. ⁵ Kunsoko amuntu anga uyu kitogola, kuite kunsoko ane unene singa kitogola, kuleka unegetu wane. ⁶ Anga ndowe kutogola, singe aenamupungu, kunsoko ae kuligilya etai. Kuite kuleka kitogola, nsoko kena waule nua kusinga lukulu nanso kukela nekekigeela mung'waane, ang'wi kija kupuma kung'waane. ⁷ Singa kitogola gwa kunsoko aukunukuilwa nua ukUILWE kuile singa kutula nelogoha, elija ae leikilwe mumueli wane, muluung'wa nua mulugu kumbuluga unene, singa ae nzetula nuwihumbuli. ⁸ Nkua itaatu ae numupepeeye umukulu kunsoko aeli nsoko nuanso waheje kupuma kung'waane. ⁹ Nung'wenso wikambile, "Uukende wane ukondile kunsoko ane. Kunsoko engulu igela muunegetu. Uuu, azanzee sumbiilya lukulu kitogola lukulu muonegetu wane, nsoko kena uuhumi nuang'wa Kilisto uhumi wicie mung'waane. ¹⁰ Kuite nkondile nsoko ang'wa Kilisto, muonegetu, mutukelwi, mulwago, mukagigwa, mumasigo. Kunsoko itungu nenkole muonegetu, hange nkete ngulu. ¹¹ Unene naina nemupungune! unyenye aemunsingilye kueke, kunsoko angeze ae munkuiye umenunyenye. Kunsoko singa ae numuula lukulu kuatuungwa -aza ateze une singa kintu. ¹² Ilengasiilyo yatai ni niyaatuung'wa ae itendekile katekate anyu kuigigimeeli, ilengasiilyo niaukuilwa nintendo nu nkulu. ¹³ Kuule nae mutuile miasanigwa nea pihe kukela imatekeelo nasagile, singa ae

nemuligo kitalanyu? Munsamile kigazo ile.

¹⁴ Goza unene nkondile kiza kitalanyu nkua itaatu. Singa ana kutula nemuligo kitalanyu, kunsoko singa ndoilwe, nekanyu. Numutakile unye. Kunsoko iang'nya kuika usagi kunsoko aleli. Kuleka ite ialeli yianonee kuike uusagi kunsoko ang'nya. ¹⁵ Kulowa lukulu kutumila nukutumilwa kunsoko amoma anyu. Ang'wi nealoilwe kukela, inonee mundowe uninoo?

¹⁶ Kuite ang'wi uu, singe kumuhumiilya muligo unyenye kunsoko kena unene nemuhugu kukela, unene yuyu nae umuambile unye yatula anga ae nemuligilye kuuteele. ¹⁷ Itee, ae nihoile kitumela nsailo kuwehi nae numutumile kitalanyu? ¹⁸ Ae numupepeeye u Tito heza kitalanyu, hange nekatuma numuntu umuya palung'wi nuyo. Itee, u Tito ae umitumie nsao yedune? Itee singa ae kugendile inzila yiyoziyo ne? Itee, singa ae kugendile impambatilyo zizo zizo ne?

¹⁹ Musigile kena imatungo aya ehi ae kuinena usese udu kungwaanyu? Ntongeela ang'wi Tunda nukung'wa Kilisto, aekenda tambula kela ekintu nsoko akumuzenga unyenye.

²⁰ Kunsoko nogopile kena nene ikiza nikumile numuulye unye anga uu insula ane. Nogopile kena muhumile muleke kundija unene anga nemukete insula. Nogopile kena muhumile kutula nuudui, wetu, wigeli nuautaki, nsula au winyene, witegeli, logoha, nuwilei. ²¹ Nogopile kena nekusuka hange. Itunda wane uhumble kumpa upolo ntongeela anyu. Nogopile kena nikumile kulija ukia widu kuawa nei tumile imilandu kuleka itungo ile nawe nesinga ae

aungamile uube, muukosi nemakani ansula neematenda.

13

¹ Iye nkua aka taatu keza kitalanyu “Kela usemelani kusinja uzengwe nuwigeeli nua kueli abiili ang’wi ataatu. ² Nakondya kulunga kuawa nei tumile imilandu nukuangiza ehi imatungo nae nkole kungwanso nkue akabiili, kulunga hange: Nenekiza hange sunga kumigigimiilya. ³ Kumuila unye ele kunsoko muhuduma uhueli kena Ukilisto ukutambula kukeela nene. Nuanso singa munegetu kitalanyu, kuleka ite, nuanso ukete ngulu mukati anyu. ⁴ Kunsoko ae upagekilwe kuunegetu, kuite ukole mupanga kungulu yang’wi Tunda. Kunsoko usese gwa keanegetu mukati akwe, kuite kuita kuikie nuyo kungulu yang’wi Tunda muuang’wi anyu. ⁵ Igoze uewe uone ang’wi wimukono muhueli. Igemeelye uewe. Shamkulengana kena u Yesu Kilisto ukole mukati anyu? Nuanso ukole, ang’wi shanga uu mukile higeeligwa. ⁶ Hange nkete ugimya kena unye mukulenga kena usese shanga ae kuhitilwe. ⁷ Itungo ile kulompa kung’wi Tunda kena muleke kuhume keki nekibi. Singa kulompa kena kuleke kuhuma kigeela kukeile migeng’wa, kuleka ite kuigela anga kulengilwe igemo. ⁸ Kunsoko usese singa kuituma keki hensengelima katai, kuite nsoko atai udu. ⁹ Kunsoko kuloilwe imatungo nekukole keanegetu nunye mukete ingulu. Kuulompa gwa kena muhume kutendwa mupikeeli. ¹⁰ Kumaandeka imakani aya imatungu nenkole

kule nunyenye, kunsoko kena imatungo nenkole palung'wi nunye singa ndoilwe kigeelya uutaki kung'waanyu. Singa ndoilwe kigeelya uhumi nua mukulu nae umpee unene nemuzenge hange siga nemubipye pihe. ¹¹ Ite gwa, aluna nea goha nawe nia sungu, lowi itumi imelemo nsoko akususha mupegwe umoyo, migombye unyenye kua nyenye, nukie mupolo, hange ni Tunda nua ulowa nuupolo ukulula nunyenye palung'wi. ¹² Ilamushi kela ung'wi kulungeli nua welu. ¹³ Ahueli ehi atumile nulamu, amulamukilye. ¹⁴ Ukenda nua Mukulu u Yesu Kilisto, ulowa wang'wi Tunda, nuu palung'wi nuang'weug'welu utule palung'wi nunye mehi.

**Isanzu Bible
The New Testament in the Isanzu language of
Tanzania**

copyright © 2020 Door 43 International Mission Community

Language: Kiisanzu (Isanzu)

Translation by: Door 43 International Mission Community

Contributor: Bundala Isanzu, MCH Bundala, Mlilo Isanzu, Rev. Bundala Samwel

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-07-31

PDF generated using Haiola and XeLaTeX on 11 Nov 2022 from source files dated 31 Jul 2020
b95c8559-38aa-5982-90b8-16a1be58209c